

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst ("Službene novine Zeničko-dobojskog kantona", broj 7/10) na prijedlog Ministarstva za boračka pitanja, Vlada Zeničko-dobojskog kantona, na 75. sjednici, održanoj dana 16.08.2012. godine, d o n o s i

ZAKLJUČAK

I.

Prihvata se Informacija o stipendiranju branilaca i članova njihovih porodica u studijskoj 2011/2012. godini, Ministarstva za boračka pitanja, kao obrađivača.

II.

Informacija o stipendiranju branilaca i članova njihovih porodica u studijskoj 2011/2012. godini, nalazi se u prilogu i čini sastavni dio ovog zaključka.

III.

Zaključak stupa na snagu danom donošenja.

Broj: 02-_____/12.

Datum, 16.08.2012. godine

Z e n i c a

PREMIJER

mr.sci. Fikret Plevljak, dipl.ing.

DOSTAVLJENO:

1x Ministarstvo za boračka pitanja,

1x a/a.

Bosna i Hercegovina
Federacija Bosna i Hercegovina
Zeničko-dobojski kanton
MINISTARSTVO ZA BORAČKA PITANJA

I N F O R M A C I J A
o stipendiranju branilaca i članova njihovih porodica
u studijskoj 2011/2012.godini

Zenica, avgust, 2012.godine

DIO PRVI - Uvod

U politici poboljšanja socijalno-ekonomskog položaja branilaca i članova njihovih porodica na području Zeničko-dobojskog kantona, posebna pažnja pripada obrazovnoj politici, s obzirom da će u planiranju budućnosti obrazovni nivo ove kategorije određivati sposobnost istih da se uključe u proces rada odnosno rezultate koji će se radom ostvarivati.

DIO DRUGI - Normativna regulativa

POGLAVLJE I – Zakonski propisi

Ustavom Federacije BiH propisano je utvrđivanje obrazovne politike, uključujući donošenje propisa o obrazovanju i osiguranje obrazovanja u nadležnosti kantona.

Pravo na stipendiranje studenata pripadnika branilačke populacije kao pravo koje se ostvaruje na nivou kantona, regulisano je federalnim i kantonalnim propisima i to:

- u članu 7. Zakona o pravima branilaca i članova njihovih porodica ("Službene novine Federacije BiH" br. 33/04 i 56/05),
- u članu 3. Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" br. 73/05 i 70/06),
- u članu 23. Zakona o dopunskim pravima branilaca i članova njihovih porodica ("Službene novine Zeničko-dobojskog kantona br. 6/06 i 9/07).

POGLAVLJE II – Uredba o stipendiranju branilaca i članova njihovih porodica

Uredbu o stipendiranju branilaca i članova njihovih porodica- Prečišćeni tekst („Službene novine Zeničko-dobojskog kantona“ br. 2/09) donijela je Vlada Kantona, kao podzakonski akt na osnovu člana 23. Zakona o dopunskim pravima branilaca i članova njihovih porodica, prema kojem "Branioци i članovi njihovih porodica imaju pravo na dodjelu stipendije za redovni studij na visokoškolskim ustanovama na području Bosne i Hercegovine, u skladu sa posebnim propisom koji donosi Vlada Kantona, a kojim se naročito utvrđuje visina novčanih sredstava za stipendiranje, uvjeti, način i postupak dodjele stipendija, kao i ostala pitanja od značaja za ostvarivanje ovog prava."

Uvođenjem Bolonjskog načina studiranja, Ministarstvo za boračka pitanja Zeničko-dobojskog kantona (u daljem tekstu: Ministarstvo) kao nosilac aktivnosti na dodjeli stipendija po Uredbi, opredjelilo se za stipendiranje redovnog studija prvog i drugog ciklusa.

Uredbom je utvrđeno da visina stipendije za prvu godinu studija iznosi 800,00 KM, a za drugu i ostale godine studija, te za prvu i drugu godinu drugog ciklusa iznosi 1.200,00 KM.

Isplata stipendija se vrši u osam jednakih mjesečnih rata koje iznose za prvu godinu studija 100,00 KM, a za drugu i ostale godine studija 150,00 KM.

Pravo na dodjelu stipendije, na način i po postupku utvrđenim ovom Uredbom, imaju:

- a) dobitnici ratnih priznanja ili odlikovanja;
- b) ratni vojni invalidi;
- c) demobilizirani branioци koji su u redovima Oružanih snaga proveli najmanje 6 mjeseci u periodu od 18.09.1991.god. do 23.12.1995.god.;
- d) djeca šehida, poginulih, umrlih i nestalih branilaca;
- e) djeca poginulih, umrlih ili nestalih dobitnika ratnog priznanja ili odlikovanja;
- f) djeca umrlih ratnih vojnih invalida;
- g) djeca umrlih demobiliziranih branilaca – učesnika rata;
- h) djeca ratnih vojnih invalida – učesnika rata;

- i) djeca demobiliziranih branilaca koji su u redovima Oružanih snaga proveli najmanje 24 mjeseca u periodu od 18.09.1991.godine do 23.12.1995.godine.

Pravo učešća na konkursu za dodjelu stipendije nemaju kandidati koji su:

- a) studenti-apsolventi;
- b) u tekućoj studijskoj godini na istom ili drugom fakultetu ponovno upisuju istu godinu studija;
- c) koji su na vanrednom studiju
- d) koji primaju kredit ili stipendiju drugog davaoca;
- e) čiji prihod po članu domaćinstva prelazili iznos od 80% prosječne neto plaće isplaćene u Kantonu u prethodnoj godini.

S tim da se tačka e) ne odnosi na kandidata – člana porodice šehida, poginulog, umrlog, nestalog branioca i umrlog ratnog vojnog invalida i člana uže porodice poginulog, umrlog ili nestalog dobitnika ratnog priznanja ili odlikovanja.

Uz prijavu na konkurs kandidati dostavljaju sljedeću dokumentaciju:

- a) fotokopiju lične karte;
- b) dokaz o statusu branioca i člana njegove porodice;
- c) potvrdu o redovnom studiju;
- d) dokaz o ostvarenom uspjehu u prethodno završenoj školskoj/studijskoj godini (ovjerena kopija svjedočanstva/uvjerenje o ostvarenom prosjeku ocjena u predhodnoj studijskoj godini);
- e) ovjerena kućna lista;
- f) uvjerenje ili drugi dokaz o prihodu za svakog punoljetnog člana domaćinstva sa kućne liste;
- g) izjavu da ne prima stipendiju po drugom osnovu.

Prijava na konkurs sa potrebnom dokumentacijom podnosi se općinskoj službi nadležnoj za poslove branilačko-invalidske zaštite u općini u kojoj kandidat ima prebivalište, odnosno, ukoliko se radi o povratniku u RS, u općini u kojoj ostvaruje prava iz branilačko-invalidske zaštite ili najbližoj općini na području Kantona.

Izbor kandidata za dodjelu stipendija vrši se na osnovu liste prvenstva, sačinjene bodovanjem po slijedećim kriterijima:

- a) ostvaren uspjeh u prethodno završenoj školskoj/studijskoj godini;
- b) socijalno-ekonomska situacija;
- c) ratna priznanja, ratni staž i invaliditet roditelja.

Pravo na dodjelu stipendije bez bodovanja imaju kandidati koji su: dobitnici ratnih priznanja ili odlikovanja; ratni vojni invalidi; demobilizirani branioci; djeca šehida, poginulih, umrlih, nestalih branilaca, poginulih, umrlih ili nestalih dobitnika ratnog priznanja ili odlikovanja, umrlih ratnih vojnih invalida, umrlih demobiliziranih branilaca i djeca ratnih vojnih invalida sa procentom invaliditeta 70% i više.

Stipendija po Uredbi se dodjeljuje samo jednom kandidatu iz jednog porodičnog domaćinstva sa izuzetkom za kandidate - djecu šehida, poginulih, umrlih i nestalih branilaca, umrlih ratnih vojnih invalida i umrlih demobiliziranih branilaca.

DIO TREĆI - Dodjela stipendija u studijskoj 2011/2012.g.

Stipendije u studijskoj 2011/2012.godini dodjeljivane su kandidatima izabranim po osnovu rezultata konkursa koje je raspisalo Ministarstvo u Dnevnom avazu dana 26.10.2011.god., a obavještanje o objavljenom konkursu je izvršeno i putem nadležnih općinskih službi za branilačko-invalidsku zaštitu, kantonalnih branilačkih organizacija, oglasne ploče i web stranice Kantona.

Za stipendiranje studenata branilaca i članova njihovih porodica u Budžetu Kantona za 2012.godinu planiran je iznos od 1.400.000,00 KM. Napominjemo da je konkurs raspisan prije

donošenja Budžeta za 2012.godinu i konkursom nije preciziran ukupan iznos sredstava za ovu namjenu, nego je u skladu sa članom 23. Uredbe navedeno da će sredstva biti opredjeljena „u visini od najmanje 10% ukupnih budžetskih sredstava Ministarstva za boračka pitanja“.

Iznos opredijeljenih budžetskih sredstava po općinama određen je na osnovu procentualnog učešća pripadnika branilačke populacije u odnosu na njihov ukupan broj u Kantonu, a prema zvaničnim podacima sa kojima je raspolagalo Ministarstvo.

U skladu člana 26. Uredbe ministar Ministarstva je donio Instrukciju za provođenje konkursne procedure za dodjelu stipendija studentima (prvog i drugog ciklusa visokog obrazovanja)-braniocima i članovima njihovih porodica za studijsku 2011./2012.godinu, sa obavezujućim hodogramom aktivnosti za sve nadležne službe Kantona i Ministarstva. Predstavnicima Ministarstva su u vrijeme trajanja konkursa (od 28.11.2011. do 02.12.2011.god.) izvršili nadzor nad radom imenovanih komisija od strane nadležnih službi za branilačko-invalidsku zaštitu Kantona i po potrebi davali dopunska obrazloženja.

Sa izradom konačne liste i dostavljanjem iste u Ministarstvo (do 23.12.2011.godine) konkursna procedura stavljena je u stanje mirovanja sve do donošenja Budžeta, Programa utroška sredstava Budžeta Zeničko-dobojskog kantona za 2012.godinu planiranih u pozicijama Ministarstva za boračka pitanja, broj: 02-14-11964-1/12 od 23.05.2012.godine i Zaključka Vlade broj: 02-38-12925/12 od 31.05.2012.godine kojim je odobreno korištenje sredstava iz Budžeta Zeničko-dobojskog kantona za 2012.godinu za potrebe isplate stipendija pripadnicima branilačke populacije za studijsku 2011/2012.godinu u ukupnom iznosu od 1.400.000,00 KM.

Na osnovu sačinjene Konačne liste, općinska služba je donijela rješenja o dodjeli stipendija izabranim kandidatima, u skladu sa članom 211. Zakona o upravnom postupku, odnosno rješenja o odbijanju ili odbacivanju zahtjeva za dodjelu stipendije u skraćenom postupku na osnovu člana 139. stav 1. i 2. Zakona o upravnom postupku.

O žalbama na rješenja općinskih službi rješavalo je Ministarstvo. Ukupan broj podnesenih žalbi bio je 140, od koji je uvaženo 18, kao osnovane i istima su dodijeljene stipendije. 115 žalbi je odbijeno, 3 odbačene, a 4 žalbe vraćene na ponovni postupak. Za 32 studenata koji nisu potpisali ugovore o stipendiranju iz razloga: napuštanja redovnog studiranja, nedolaska na zaključivanje ugovora, nepredočavanja indexa na uvid, neovjereni semestri (zimski i ljetni) prima stipendiju drugog davaoca... u skladu sa članom 26. tačka 2) Uredbe, a uvezi sa članom 260. stav 2. Zakona o upravnom postupku, Ministarstvo je po pravu nadzora ukinulo rješenja prvostepenih organa.

Po okončanju navedene procedure ministar Ministarstva, u ime Vlade Kantona, sa izabranim kandidatima je u drugoj polovini aprila zaključio ugovore o stipendiranju, kojima su utvrđena prava i obaveze ugovornih strana. Po ugovoru, obaveza Ministarstva je da osigura sredstva za isplatu stipendija, a obaveza studenata je da redovno pohađaju nastavu i ovjere semestre. Neizvršavanje navedenih obaveza predstavlja osnov za raskid ugovora.

DIO ČETVRTI

- Tabelarni pregled prijavljenih studenata i odobrenih stipendija sa komentarom

Općinske službe za boračko-invalidsku zaštitu Kantona zaprimile su **2350** zahtjeva za stipendiju za studijsku 2011/2012. godinu. Pregled broja prijavljenih kandidata po općinama i kategorijama branilačke populacije prikazan je u tabeli broj 1., a u tabeli broj 2. prikazani su podneseni zahtjevi po godinama studija prvog i drugog ciklusa studiranja.

Pravo na stipendiju ostvarilo je ukupno **1307** studenata što je za 79 stipendija više u odnosu na predhodnu studijsku godinu.

Pregled broja stipendista po općinama i kategorijama pripadnosti branilačkoj populaciji prikazan je u tabeli broj 3.

U tabeli broj 4. dat je pregled po godinama studija prvog i drugog ciklusa, u tabeli 5. data je rekapitulacija primljenih zahtjeva i odobrenih stipendija po općinama i kategorijama, u tabeli 6. ukupan i mjesečni iznos sredstava, a u tabeli broj 7. pregled odobrenih stipendija i sredstava po općinama i godinama od studijske 2002/2003.godine.

DIO PETI - Zaključna razmatranja

Obrazovanje, kao dio obrazovne i socijalne politike našeg društva usmjereno na branilačku populaciju, dio je moralnog duga države prema populaciji, koji ona i putem stipendiranja studenata branilaca i članova njihovih porodica, pokušava da oduži i pruži zahvalnost istim za uloženo (život, zdravlje i dr.) odnosno urađeno za odbranu zemlje.

Imajući u vidu da su analize iz dosadašnjeg perioda dodjele stipendija pripadnicima branilačke populacije pokazale da je među stipendistima najveći broj onih koji su postigli dobar uspjeh u toku školovanja, te da se radi o porodicama koje se nalaze u stanju socijalne potrebe, smatramo da je stipendiranje branilaca i članova njihovih porodica u potpunosti opravdalo svoju svrhu.

Evidentno je da se iz godine u godinu povećava broj prijavljenih studenata na konkurs za dodjelu stipendija, što ukazuje na potrebu praćenja navedenog i povećanja budžetskih sredstava za ovu namjenu u narednim godinama, kako bi omogućili stipendiranje što većeg broja studenata.

U ovom smislu poželjno je omogućiti dodjelu stipendija, a na nivou Zeničko-dobojskog kantona svim redovnim studentima.

Navedeno je moguće realizirati objedinjavanjem dodjele stipendija na nivou nadležnog Ministarstva po principu da **svaki student, a koji redovno studira na teritoriji Bosne i Hercegovine i ima prebivalište na području Kantona dobije stipendiju** Vlade Zeničko-dobojskog kantona.

Prilog:

- tabele 1 do 7.

MINISTAR
Ekrem Tuka